

四庫全書

集部

欽定四庫全書

集部

太倉稊米集卷

一至三

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范廷驊

欽定四庫全書

集部四

太倉稊米集

別集類三宋

提要

臣等謹案太倉稊米集七十卷宋周紫芝撰
紫芝字少隱宣城人紹興中登第歷官樞密
院編修官出知興國軍自號竹坡居士是集
樂府詩四十三卷文二十七卷前載唐文若
陳天麟及紫芝自序集中悶題一首下註云

壬戌歲始得官時年六十一是紫芝通籍館
閣業已暮年可以無所干乞而集中有時宰
生日樂府四首又時宰生日樂府三首又時
宰生日樂府七首又時宰生日詩三十絕句
又時宰生日五言古詩六首皆為秦檜而作
秦少保生日七言古詩二首秦觀文生日七
言排律三十韻皆為秦熈而作大宋中興頌
一篇亦歸美於檜稱為元臣良弼與張嶠紹

興復古頌用意相類殊為老而無恥貽玷汗
青集中嘗引蘇軾之言謂古今語未有無對
者琴家謂琴聲能娛俗耳者為設客曲頃時
有作送太守詩者曰此供官詩不足觀於是
設客曲乃始有對因戲作俳體詩曰設客元
無琴裏曲供官尚有選中詩云云是數篇者
殆所謂供官詩歟然其詩在南宋之初特為
傑出無豫章生硬之弊亦無江湖末派酸餽

之習方回作是集跋述紫芝之言曰作詩先
嚴格律然後及句法得此語於張文潛李端
叔觀於是論及證以紫芝詩話所徵引知其
學問淵源實出元祐故於張來柯山龍閣右
史譙郡先生諸集汲汲搜羅如恐不及葉夢
得石林詩話所謂冠國寶詩自蘇黃門庭中
來故自不同者也畧其人品取其詞采可矣
乾隆四十四年十一月恭校上

總纂官臣紀昀臣陸錫熊臣孫士毅

總校官臣陸費墀

太倉稊米集原序

始余來東南聞士大夫誦宰掾周公少隱詩文每擊節
賞歎以謂清新偉麗自成一家非真有悟解不能名一
世獨恨不見其全逮守九江之明年歲次甲申冬至後
三日今吏部侍郎陳君季陵經從集庾樓上出公太倉
稊米集七十卷命余為序是時敵再犯淮沿江郡多故
欲讀未暇乾道改元乙酉春和議成邊城撤備民訟少
得餘力觀書一日卧愛日堂取公古律詩記銘書序雜

著數十百篇細讀而哦之竊駭古人關鍵難名之妙公
盡驅入筆端蓋前輩文采專以格致為高垂世不朽端
不偶然噫此豈可與新學小生口舌辨哉然王震序曾
南豐之文謝克家序陳後山之詩或謂巨題晚進不當
為若余則于天下無所畏讀余序迺知當為不當為自
有定論而公詩文雖不待序而必傳無疑也左朝議大
夫充敷文閣待制知江州軍州提舉學事兼管內勸農
營田使眉山唐文若序

宣人之為詩蓋祖梅聖俞聖俞以詩鳴慶厯嘉祐間歐范尹蘇諸鉅公皆推尊之後百餘年又得竹坡先生繼其聲而周與梅在宣為著姓且親舊家也竹坡同時有王次卿僧彥邦道常三人皆能詩王死于兵不復傳彥邦學為詩而未至道常筆力頗過彥卿其後亦無聞惟竹坡之詩聲厭服江左天麟未第時從竹坡游公謂予曰作詩先嚴格律然後及句法予得此語於張文潛李端叔故以告子且言郭功父徒竊虛稱在詩家最無法度天麟欽佩此語退

而學詩不敢越尺寸久而自定然後知公之善教人前年過九江公家在焉往拜遺像哭而弔其孤誦其餘文以語太守唐立夫舍人立夫急取公文集相與閱于庾樓上讀之聲震左右立夫最重許可至是擊節且為序之竹坡于書無所不讀發而為文章不讓古作者其詩清麗典雅雖梅聖俞當避路在山谷後山派中亦為小宗矣彼郭功父輩執鞭請事可也官晚而名不達自興國守罷居九江貧不能歸宣城而江山之勝蓋為晚助云公名

紫芝字少隱乾道丁亥上元左朝散郎充集英殿脩撰
知襄陽軍府事提舉學事兼管內勸農營田使充京西
南路安撫使馬步軍都總管兼提領措置屯田陳天麟序
自序

昔余為童子未冠入鄉校方學科舉文文成掌教者善
之于是長者稍從而稱其能焉余曰是足以得名不足
以名世也乃喜誦前人之文與其詩往往為之廢業而
前日之稱其能者悉啗之不齒也一日先君戲為客言

是子肩有詩骨在法當窮而又好詩窮固必矣自是好之不衰如人飲酒日甚一日然卒亦不能工也中年取少時所作而誦之悉皆棄去可嘔也老來取中年所作而誦之則又皆弃去可笑也今老矣而竟不能加安知他人誦之不嘔且笑耶小兒曹未嘗學文不識詩病誤以為好而掇拾其遺得若干卷錄而藏之問名于余余告之曰文章一小技于道未為尊也使有補于世教猶殆庶幾不然徒費紙札耳不足錄昔者山谷先生書告

其甥曰文章直是太倉一稊米耳黃公之文可與馬遷
揚雄劉向之徒相為表裡若其詩則杜子美蘇子瞻而
下不數也而猶小之如此況不逮其萬有一者乎後數
年而集亡當于東家醬瓿上而求之其必有得與

欽定四庫全書

序
大業形才集

欽定四庫全書

太倉稊米集卷一

宋 周紫芝 撰

樂府三十首

吹臺曲

天門玉鑰雙龍開霓旌羽蓋天上來
管絃嘈雜入霄漢
美人侍燕黃金臺羽觴行酒歡未足
燕姬成行列紅玉
梁王半醉起更衣
夜按玉簫親度曲
曲終舉袂俱爭妍
拜舞樽前稱萬年
三山玉女朝羣仙
當時弄玉飛上天

至今臺下草如烟

越臺曲

玉顏如花越王女自小嬌癡不歌舞嫁作江南國主妃
日日思歸淚如雨江南江北梅子黃潮頭夜漲秦淮江
江邊雨多地卑濕旋築高臺勾曉粧千艘命載越中土
喜見越人仍越語人生腳踏鄉土難無復歸心越中去
高臺何易傾曲池亦復平越姬一去向千載不見此臺
空有名

巫山曲

楚宮夜半旌旗動曉逐君王獵雲夢君王醉挽金僕姑
笑射雙鵬落飛鞚霜風獵獵吹白羽絨鞍下時日未午
天上臺高翠被寒雨濕烟霏夢神女行雲飛去不可留
却望陽臺無處所魂凝睇遠烟淒迷猿啼巫峽東復西
江邊獵火一萬炬貂裘醉擁君王歸章華千門復萬戶
侍女焚香迎輦步君心誰能念舊恩忍淚悲啼不成語
願壽君王一萬年常向陽臺夢雲雨

白苧歌

大垂手小垂手江南白符世希有吳姬十指玉纖纖白
苧新裁舞衣小秋江四面繞吳宮吳宮霜橘樹樹紅吳
王夜燕不知曉但見紅日昇瞳矐美人低鬟復回袖持
酒獻君君一笑人生得意不行樂白日如梭夜催晝吳
山依舊吳江清離宮故苑難為情不知誰遣南山鹿還
向姑蘇臺下行

五雜俎

五雜俎壠頭水往復來玉關騎不得已從士子
五雜俎雲際翮往復來長安陌不得已千里客
五雜俎夜茫茫往復來鴈南翔不得已思故鄉

荔枝香

千秋節當八月五御樓卷簾看馬舞黃衫玉帶分兩行
繡衣宮人擊雷鼓梨園法曲淒且清相傳猶是隋家聲
宜春北院蛾眉小初按新聲未有名侍女焚香跪瑤席
更看真妃作生日恰值南方驛使來旋採風枝露猶濕

當時盛事人爭傳荔枝香曲是新翻宮中行樂事亦秘
此曲不許人間聞馬嵬夢斷香塵息滿山荔子無人摘
却歸西內冷如冰一聽遺音淚空滴

武谿溪

五谿妖蠻盤瓠種穴狐跳梁恃餘勇漢庭老驥聞朔風
兩耳如錐四蹄踴南方毒霧墮跼爲五谿谿深軍不前
健兒六月半病死欲渡五谿無渡船將軍誓死心獨苦
本爲官家誅黠虜誰知君側有讒徒剛道將軍似賈

胡人生富貴一哀歌會令意改成明珠祁連高結衛青
冢文淵藁葬無人送至行客武溪傍誰為將軍一悲
慟

公無渡河

清江漫漫日夜流江邊無風人自愁馮夷擊鼓河伯怒
蛟龍掉尾魚吞舟人生一死亦難處何不相從聽媼語
公無渡河公自苦人心險過山嵯峨豺狼當路君奈何
勸君收淚且勿歌世間平地多風波

飲馬長城窟行

長安城邊邊地永萬里沙場地無井秦人掘土土作城
城下窟深秋水冷漢家將軍號都護西征上隴寒日暮
野駝跑水無處尋飲馬長城窟邊去長城窟古來戰死
多白骨征人半作馬下塵猶向陰山關馳突去時寥天霜雁
鳴歸見玉關春草生將軍功高封列城關死伍符無姓名

金童歌

并引

漢武帝作金童仙人以承露盤魏明帝青龍間詔以

車西取及臨載仙人乃潜然淚下唐詩人李長吉作
歌以哀之杜牧之為賀作集序獨於是詩有取焉予
因讀長吉詩愛其奇古然味牧之所謂其於騷人感
刺怨懟之意無得而有焉乃為續賦以系樂府之末

武皇開疆三萬里滇池初穿栢梁起更鑄仙人承露盤
萬歲千秋奉天子當時謾說邠金刀誰知更有當塗高
銅雀臺高阿瞞死八方才人閒如蟻玉井綺欄心未厭
猶取金仙著前殿金仙辭漢憶漢主登車殷勤垂玉筋

獨捧金盤出故宮回頭忍看咸陽樹魏宮羣臣眼親見
朝着魏冠暮歸晉可憐長安肉食兒不如頑銅猶有知

日出東南隅行

春風淡蕩春雪淺陌上柔桑青宛宛青天易雨亦易晴
吳蠶催眠欲成繭羅敷採桑南陌頭翠鬟鬢鬢光欲流
羅襦吹香白玉佩青絲絡籠黃金鈎君王年少如秋水
欲學鴛鴦對飛起贈君身上雙明璫結君同生亦同死
羅敷歛衽前致詞詞多慷慨中含悲念言夫婿良家子

妾身結髮為夫妻人生匹配各有偶
願逐狗走隨雞飛
江水可竭山可移妾心皎皎君當知

烏夜啼

黃門急詔下趣封南郡王
鸞輅儼且深班劍列成行
建以左肅旆樹以羽葆
幢骨肉厚恩義門戶生輝光
分封得大國四境彌土疆
那知以嫌猜將身觸真怒
徵我還上都令我不得住
奪我封侯印被我五兩組
低頭屏氣息對客不敢語
紅窓昏夜燈白淚墮秋雨
鬱鬱兩大樹

依依近墻宇，鵲枝上啼。腦腦振兩羽，沉沉夜未央。統
統方三鼓，侍兒聞之喜。攬衣中夜起，起敲齋閣門。秉燭
具有旨，再拜前致詞。靈烏未可鄙，吾聞烏夜啼。霈澤覃
萬里，杲杲方平旦。使者已在門，官家有詔書。為君敦厚
恩，舊憤知己釋。徒封意，增勤客有鮑。書記當代稱能文，
命作啼烏曲。樂府傳清芬，人生欲富貴。生身恨不早，富
貴豈不好。危機亦難蹈，古來兄弟間。生死在一朝，煮豆
然豆。豆葉焦，靈烏莫厭聲。曉曉

上之回

漢宮三十六複道高崔嵬皇情極遊豫警蹕北之回蒼
螭挾龍輶風伯清路埃羽衛森戛擊玉輿久徘徊青娥
絕望幸故宮秋葉催舉頭望霄漢白露零玉階

得寶子

蓬萊宮中春草綠君王無事歡不足宜春北院小蛾眉
日日霓裳按新曲侍女傾心復盡計歌舞君前不如意
今年新得太真妃從此龍顏不勝喜望春樓下紇那歌

枉說揚州古銅器梨園樂府兩部齊盡歌樂府新歌詞
君門誰道九重遠歲久歡聲聞遠夷漁陽萬騎倉黃入
帳中妃子吞聲泣當時掌上不忍看玉骨埋時烟雨濕
屬車塵遠空郵亭郵亭牧豎嗟娉婷凌波襪在香未絕
萬人爭看俱傷情一朝持入咸陽市空得千金賈客驚

昭君行

漢宮侍女知幾千爭妍取寵俱可憐誰知恩愛託畫手
黃金買得昭陽眠昭君自恃玉顏好未信光陰鏡中老

不知萬里嫁單于
憔悴蛾眉葬秋草
憶得昭君初嫁時
含羞忍淚無人知
朔天漫漫沙漠遠
空抱琵琶說別離
捐金得寵固可恥
委身絕域不如死
世間妍醜何曾分
自古賢愚亦如此

烏飛曲

江雲欲雪江風吹
王敦城頭烏夜啼
雲深月暗風轉急
驚鳥繞樹無安枝
狂風忽來飛不定
夜半無巢何所依
情知天公有風雨
何不結巢高樹棲
君不見秦氏庭中

雙桂美庭烏生雛八九子烏生豈不念高飛託君庭陰
飛不起那知君家輕薄兒彈丸脫手兩翅垂無巢悔不
巢巍巍有巢悔不常高飛人生禍福難豫期

秋蘭詞

秋蘭當九畹蘭生香滿路綉君身上衣光明奪縑素孤
芳一哀歎凋零濕秋露佩服得君子亦足慰遲暮採摘
良不辭新枝忽成故向來桃李場紅顏照當戶紛紛自
芳菲榮枯復誰顧

金錯刀

美人臨曉鏡睡足含春嬌手持白玉尺睥睨金錯刀欲將
雙綵鳳對飛宮錦袍誰知遊冶郎經年事遊遨但知山上
山不說大刀頭君看良家子盡屬六郡豪一朝著衷甲萬
里隨炊刁家人剪春衫欲寄道里遙緘封望絕塞蓬首時
自搔蕩子會當歸行人日儵儵別去隔生死不保夕與朝
寄言樓中婦清淚且當收猶勝作征衣遠寄邊城秋

湖陰行

并引

余遊于湖過王敦故城誦溫庭筠所作湖陰
曲雖辭彩光耀實絕古今而誅奸戮逆固已
無憾然敦之包藏禍心蓋亦久矣東晉君臣
不戒履霜以翦豪釐曾不若石崇廁婢知其
他日必善作賊乃為湖陰後曲以廣其意

石頭城南五馬渡一馬成龍上天去晉家天子再御朝
洛陽敵騎空無數當時枉道馬與王高官飽食豐豺狼
車前已賜蘭斑物江上空餘劍戟場日光射天驚賊壘

封豕長蛇夢中起倉皇只欲玩遺鞭誰信龍媒已千里
黃鬚有智人豈知不料將軍未死時著新脫故真是賊
白天下闔天應遲誰道晉朝公與相不及金谷園中兒

隋渠行

黃榆落盡河水冰隋渠兩岸無人行雪花漫天大如掌
北風吹馬南人驚縣官藏冰避炎熱健兒鑿冰手流血
安得身隨花石官當路誰人敢呵喝黃流千里凍徹底
舳艫相仍凍銜尾天公便合回陽和桃花水暖流春波

望春樓上天顏喜齊聲爭唱紇那歌

長干曲

黃昏明月上朱樓簾旌射月香霧浮畫欄垂手樓中女
對月低眉不舉頭人似長干橋下水一去悠悠幾千里
謾道嫁雞逐雞飛長干夫壻那得知

五男父

白頭垂垂五男父一生辛勤立門戶五男炊白割紅鮮
阿翁採薪供五男悲風慘慘寒日暮翁入採山遭猛虎

猛虎磨牙卧道邊五男持戟誰敢前

魔軍行

五嶺南來山最多驅軍日涉千坡陁山中食菜不食肉
十室九家俱事魔縣官給錢捕魔鬼八萬魔軍同日起
將軍新破強敵回馬前班劍如流水生斬妖精拔羽幢
傳首天庭葉街死當時平田作戰場至今遺骸無人藏
舊居雖在人不見破屋蕭蕭圍短牆

野婦行

新安野婦雙髻垂紅膏塗靨深畫眉青襜兩幅不掩髀
赤脚一雙深染泥餉耕如賓有翁媪頭戴銀冠相媚好
銀冠猶是嫁時粧馬上不知人絕倒長年相見無別離
竟死不識愁眉啼紅顏暗逐春光老暮柳常隨落日低
秋娘一尺春風警下蔡陽城盡風靡傾城可愛亦可憐
野婦誰知有西子

輸粟行

天寒村落家家忙飯牛穫稻催滌場燎薪炊黍呼婦子

夜半春粟輸官倉大兒擔囊小負橐掃廩傾困不須惡
縣胥里正不到門了得官租舉家樂去年有米不願餘今
年米白要如珠路傍老人拍手笑盡道官兵嫌米麤良
農養兵與敵競敵騎不來自亡命田家終歲負耕縻十
農養得一兵肥一兵唱亂千兵隨千家一炬無子遺莫
養兵養兵殺人人不知

寒食曲

三月江南好春色買酒家家作寒食男呼女喚俱出遊

扶路醉歸歡樂極街頭盡日無人行多在山村少在城
踏歌賽願一時了上冢歸來聞笑聲豈料如今一百五
畫戟滿城椎戰鼓子孫半作泉下人薄酒不澆山上土
死者已往生者存隨分歡娛各兒女烹魚裹菜當盤殮
花作紅粧鳥歌舞君不見江南江北多戰場去年白骨
無人藏

木芙蓉歌

吳江十月霜華淺秋空無雲霜日暖芭蕉樹暗簾幕垂

木芙蓉開紅婉婉銀床露重梧葉飛金錢掃地秋蘭萎
無人自對秋風笑黃菊葵花不同調慢綠妖紅解醉人
徐娘未老秋娘少少年時節歡樂多紅蓮影落秋江波
若耶女兒白如玉夜半採蓮聞棹歌驚風吹浪鴛鴦起
回頭日月飛梭裡對花不飲今蹉跎淚濕秋風當奈何
雍門行

憶昔長安畫閉門敵兵四面如雲屯嗣皇明聖日月出
盡剗宿蠹清妖氛黃門急詔忽夜下驛騎四出爭馳奔

明朝都人看傳首賀客縱橫各持酒利劍空膏六貴人
富貴回頭信何有一身成粉骨成塵當時近前丞相嗔
高臺曲池已荆棘援琴誰作雍門吟

六貴人謂
蔡攸等

太倉稊米集卷一

欽定四庫全書

太倉稊米集卷二

宋 周紫芝 撰

樂府二十首

朦朧行

漢作樓船三百尺江南父老何曾識船頭擊鼓轉紅旗
船尾踏車人不知君王英畧似漢武要挽江心射蛟弩
天戈指日殄匈奴先遣偏舟下江浦三年血滿秋江紅
洞庭搖落悲秋風漫山柵水作城寨逆氣不腥河伯宮

驚濤捲地噴飛雪
艤一出千艘空
將軍自駕木城去
莫歎龍驤作阿童

五谿道中見羣牛蔽野問之容州來感其道里
之遠乃作短歌以補樂府之闕

淮田一廢不復秋
五夫扶犁當一牛
番兵大入郡不守
青窠未熟官來收
狐狸晝嘯荆棘裡
此事最貽廊廟憂
羽檄徵牛牛蔽野
問言萬里來容州
容州價賤苦易得
四蹄纔堪一劍易
來時草青今草黃
道路既遠多死傷

沙場草淺食不飽夕陽時見烏銜創江北江南幾阡陌
幾牛能滿千家倉願言田父各努力會見西風禾黍長
將軍官大馬亦壯官使敵騎窺漢疆

黥奴行

范瓊

山西驍將真黥奴兩斛笑彎金僕姑偶然浮雲變蒼狗
身騎高馬稱金吾敵兵倉黃忽南渡地黑天昏兩龍去
賊臣僭偽誰適從將軍一呵百官懼伏劍前驅趣翠華
路人辟易空回顧至今願返河陽狩荆棘艱難窘天步

未懸北闕新頭顱猶帶安西舊都護前年縱兵肥水頭
橫屍千里行人愁帳前騎士勇如虎帳下嬌娥雙臉羞
葉街流血天忽怒小兒跳梁健兒舞寄語盧龍與范陽
中書相公今尚父慎勿更如奴跋扈

秣陵行

字文粹中

秣陵城門夜不開城頭椎鼓鳴春雷緋衣擎火燎民屋
萬井一炬飛紅埃道傍橫屍人不識血流但見秦淮赤
府中官吏一百人盡取姓名書罪籍元戎被執不得歸

賊坐黃堂縱呵斥明朝傳檄下九州九州牧伯不敢收
可笑官軍縶羽箭環視走卒櫻城樓將軍樓船下巫峽
膽落雙旌俱卷甲日梟五十三頭顱一戰何曾短兵接
今年新起故將軍灞陵醉尉勿浪嗔文致太平武定亂
非渠誰復清風塵

此詩末章
歸美李綱

射鹿行

白羽紅旌繞山麓爭向山南射奔鹿獵夫舉網常苦辛
誰寢其皮食其肉腹中着子初成斑梅花碎點真珠圓

雙桃壓髻玉簪短去作誰家頭上冠貴家金多逐時好
尚蹙蛾眉嫌不早一皮可直三萬錢競作苞苴當珍寶
大者有茸胎有紋舉無遺族如何冤玉纓瓊弁者誰子
始作此俑知非賢

督梅詞

十里一候五里置渡海梯山來萬里賜入長安卿相家
夜暖金猊香徹髓瓊香入骨作曉醒斗帳燒烟隔秋水
青娥添火窓欲明紅錦薰衣人未起梅花不用波律來

零霍何勞香傳記蘭閨半掩春晝長參差吹竹羅紅粧
令君一去三日香更遣小兒縫紫囊夜來賓客滿高堂
誰家有女嫁韓郎

漢宮詞

漢宮五月多南風宮槐覆砌花陰濃彤庭破曉瑞霧薄
寶檻茂葵迎日紅池面雞頭青蹙顰菖蒲有花池水綠
殿閣風清白日長五絲結綵獻君王漢皇年來新受錄
自篆天書辟邪毒六宮此日多歡娛就中何人恩寵殊

黃金釵橫絳囊小爭帶君王親寫符

競渡曲

江風獵獵吹紅旗舟人結束誇水嬉短衣青帽錦半臂
橫波鼓鬣飛鯨鯢江潮漫漫江水濶浪花擊碎千堆雪
畫橈擘水挽不回白羽離絃箭初脫歸來醉作踏浪歌
應笑吳兒拜浪婆朱樓相映綠陰裡兩岸人家歡樂多
飯筒角黍纏五綵楚俗至今猶未改日暮空歌何在斯
不見三閭憔悴時

牛女行

天孫曉織雲錦章
跂彼終日成七襄
含情倚杼長脉脉
靈河南北遙相望
天風吹衣香冉冉
烏鵲梁成月華淺
青童侍女驂翔鸞
玉闕瓊樓降華輿
明朝脩渚曠清容
歸期苦短歡期遠
昔離今聚自有期
天帝令嚴何敢違
猶勝姮娥竊仙藥
一入廣寒無嫁時

雙鵲飛行

憶昔江鄉遭亂離
兩翁避地雙鵲飛
一鵲南翔一鵲北

北鵠墮地南鵠栖天長地遠去不返巢傾卵覆令人悲
去年賊兵初聚黨今歲王師方解圍春陵萬戶纔有幾
駱谷一家空獨歸歸尋故里不知處白骨支撐滿塗路
城西有屋無人居城東有地無屋廬彷彿相從舊遊處
淚栖雙睫還歎歔

鷺銜栢行

雙鷺何時來瀚海寄巢脩椽巢不改春深巢穩初養雛
雙雛引頸仰哺呼雄將雌出雙雛孤雛危墮地聲呱呱

雌隨雄歸見雛泣主人將雛納其室雙雛脫死翅欲開
玄衣素臆去復來明年主人開壽燕畫鼓停撾歌舞遍
雙雛傍席爭回旋共銜青栢置樽前口不能言對以臆
再拜壽君如栢年

石婦行二首

俗呼望夫石在當塗

貞婦生江南少小稱丰稷委身事良人相與歡笑同良
人去不返兩鬢常蓬鬆謂言有膏沐未識誰為容日日
上山望水遠山複重黛砧竟不來望望終無窮一朝化

作石僵立由天公天公表堅貞令與山始終仙衣綉薜
暈寶髻搖花叢滔滔日月逝此石存高峯清名閱千古
勁節摩蒼穹恨無採詩官作詩頌遺蹤用之邦國間庶
以消淫風

生男有閨房莫娶青樓倡生女事姑嫜莫嫁遊冶郎倡
家從人無定準遊子一去忘故鄉山頭義婦無人識踴
身上山生死隔人將此婦作石看不信此心元是石相
從豈復無它人覓彼兩髦真我特江流可盡山可平不

盡悠悠千古情早知郎去無消息悔不將身事尾生

擬客從遠方來

客從遠方來遺我故人書故人久別離一別萬里餘相望不相見各在天一隅感君慇懃意字字如明珠上陳昔懽樂次問今何如昔別俱少年老大今蒼鬚良時不我與歲月空躊躇餘生如夢寐尺素徒卷舒為我謝故人遠致雙鯉魚恨無木瓜篇報君以瓊琚

擬青青河畔草

四序相推遷日月倏已逝春風入猗蘭光艷照羅綺一朝霜雪至容華苦憔悴佳人惜朱顏結褵奉君子安知遠征途中道成舟置昔持鴛鴦錦裁成合歡被今織迴文機中有相思字相思日夜切尺書無雁寄誰能知妾心脉脉含遠意

擬燕趙多佳人

沙丘有餘風趙女多跼蹐

音沈

燕丹養勇士後宮出女子

至今餘倡優吹彈滿都市佳人北方來傾城盡風靡妙

舞縈纖腰清歌發皓齒一歌四座歡再歌賓客起回眸
與目成哀絃忍重理願為雙飛燕與君共棲止人生不
行樂歲月如流水

擬梁父吟 并引

諸葛孔明耕南陽時雅好擁膝為梁父吟而三
國志不載其詞唯秦佚文有之觀其詞旨非亮
所作特亮好歌此詩爾其後晉陸機宋沈約皆
有之其詞與亮所歌不同余過淮陰經韓將軍

墓追記田彊事乃擬古詞而為是詩

駕言方北征遵彼淮陰路悠悠墟落間中有淮陰墓將
軍蘊奇畧功名照今古談笑下燕齊北面師降虜一朝
遭讒誣銜冤復誰訴誰能為此謀宮中漢家婦

擬司馬相如琴歌代文君答二首 并引

卓文君欲奔司馬相如相如以琴心挑之今
樂府有琴歌二首而無文君詞為代文君作
答歌以補其闕云

鳳兮鳳兮胡不歸胡為四海求其雌其室良過知者誰
邂逅相遇君獨知彼美人兮偉容儀願與君兮相追隨
歸丹山兮棲高枝

鳳兮鳳兮鳴噓噓雄將飛兮雌將從天寒慘慘多悲
風雙翻欲舉心所同山石可鑿金可鎔妾心皎皎如日
中

莫愁歌

蓮花深紅蓮葉綠平沙月上鴛鴦宿青腰三板蘭作

曉月下莫愁歌一曲移船入花花轉深花深調苦難為
音江邊夜半誰為語只有嬋娟知此心露華漸白月漸
午刺舟自覓來時路明朝繫纜柳邊門却在夜來潮落
處

擬桃葉團扇歌三首

并引

王徽之愛姬作團扇歌三首詞固佳絕而意
若有未盡者為再作三詩以足其意

倚杼織冰紈殷勤作團扇為君惜朱顏相期日相見

裁紉作團扇纖纖如白玉歲寒不改姿持用可即目
團扇復團扇團扇亦已好但恐秋風至葉捐在中道

秋閨詞

西風動簾幙蟋蟀鳴高堂蔓草濕零露秋閨知夜長佳
人掩朱戶背燭解羅裳願言鴛鴦夢雙飛入方塘清影
橫疎櫺奈此明月光依依照長夜炯炯明愁腸不恨郎
不歸恨月入我床披衣復起坐頻翠挑殘缸開絨取素
書解結羅帶傍一讀再三歎再讀淚數行終夜不成寢

曙色忽滿窓雖云有膏沐誰能理晨粧

倡樓詞

桃李艷春風榮華照京洛九陌飛香塵朱樓響弦索美人倚脩欄青娥卷珠箔白面誰家郎已商載金索大艣何寄我繫舟樓下泊哀彈雜清歌日日樓中樂謂言如江流偕老有盟約一朝買婢娟蟬髮輕梳掠情從新人歡恩與舊人薄去年與青棠今年贈芍藥人生有榮謝曾不待哀落倡女不嫁人深心失期約

霽月謠

和羅仲共
效李長吉

江鼉吹浪江水急雷師鞭鼓旌旗濕黑風駕雨霹靂鳴
怒龍擎空半天立須臾陰雲空四垂廣寒殿冷風披披
玉觴燕罷王母歸紅鸞簇扇香霧飛

揅秧歌

和羅仲共
效王建作

田中水滿風淒淒青秧沒隴村路迷家家趁水秧稻畦
共唱俚歌聲調齊樹頭幽鳥聲剝啄半雨半晴雲漠漠
五白草斑誰敢閤農夫餉田翁自作去年兩經羣盜來

婦兒垂泣翁更哀
蠶聚燒盡不成繭
陵陂宿麥無根芽
今年揀秧憂夏旱
得雨時兵復亂
官軍捕賊何時平
處處村村聞鼓聲

古離別二首

絃斷何由續
鏡分難再圓
感君綢繆意
贈我雙紋鴛
百年會有盡
此意終難捐

行行重行行
此別深可惜
臨分意難傳
欲語淚復滴
我欲從君遊
恨乏雙飛翮

長短歌

礪石磨磚作新壘角樓亭亭四邊起誰家一曲長短歌
長安貴人葬蒿里東方作矣事若何口珠腰帶黃金多
墓門重閉子孫泣樹上紙錢空滿柯君不見胡騎南來
相州路倉皇尚覓韓王墓解鞍下馬拜墓前更遣羌兵
作調護憑誰試問爾何為定恐當年識吾父

太倉稊米集卷二

欽定四庫全書

太倉稊米集卷三

宋 周紫芝 撰

詩四十首

壬午秋日觀橋刈穫五首

時年二十一

清晨起盥櫛卷箔坐南軒紅日忽滿樹飛鳥相喧翻農
夫告鉏艾導我之前村露晞芒屨滑地僻秋蕪繁行行
不逾里委蛇到其門父老喜客至為黍烹雞豚勸我當
力穡醉中多好言低頭謝父老我志久已存歸來三歎

息默誦歸田園

交親不相知笑我營小築人生如風燈一滅不容續勝
負棋一枰信手安用覆與君共此世百歲但信宿進退
均有求要各隨所欲君軌趨朝市我履在林麓胡為浪
相笑吾計念已熟客來不與辨聊用銘我屋

代馬嘶北風遊子思故鄉富貴人所羨危機亦難防暮
上巢豈安劍頭炊易傷乃知三畝耕此策為最良寒士
但藜藿肉食餘膏粱脫粟衆所食萬錢誰得嘗終然均

一飽果腹俱徜徉飯蔬豈不樂厚味生禍殃以此較得失豈復無短長

人言秋日短無事日更長籬落既補治稼穡已滌場薄暮有微興悠然步東岡東岡棗與梨纍纍半青黃幽菊雖未吐已含風露香風物良可喜客來有杯觴但使常如此貧賤亦何傷

祠宮昔所築古屋棲真靈誰知員嶠徒亦歎曲池平我即廢址北結茅寄幽情高秋肅萬籟彷彿聞簫笙夜夢

着瓊冠結佩朝王京談笑悟至理俯仰了八紘安能事
香火餐霞學長生明朝日復出抱耒還躬耕

題龍眠畫四馬圖

裕陵神謨與天通崑崙以西俱鑿空渥洼初來九夷服
盡得大宛三象龍于閭鳳腦世未識但見蹴踏長秋風
鬼章錦膊驚絕代更看吐蕃獅子驄奚奴骭髀雙眼碧
錦韉錯落青絲籠最後一匹號雄健見自往來天仗中
羽林騎士鐵撾肅鳴珂蹀躞纓垂紅諸番入貢御閑溢

君王畫坐蓬萊宮為臨玉陛閱神駿詔寫真形誰最工
龍眠妙伎非俗畫不數當年老曹霸三驄豈是拳毛騮
倣儻權奇頗閒暇籥雲之姿迥萬里太一來飢天馬下
內人傳看十二蹄一笑微生咫尺威自從鼎湖弓劍墜
龍媒上天久不歸只今空對畫圖泣忍聽鳥呼金粟堆

遊麻姑觀

宣城有麻姑山
山中有觀

清秋未忝罷南畝幽事少凌晨有佳興振策事輕矯微
踪躡飛猿雄眺高木杪上有仙子祠棟宇頗傾撓騰虛

想雲耕遺像空鳥爪黃冠三四輩生意良草草更欲問
丹爐雲山遂窮討道人笑不言此意未遽曉但云須趣
懷山靜虎出早勝踐良獨難仙事亦杳渺了知世俗人
塵凡隔蓬島

小壺貯江蠟二梅幽絕俱可喜作三絕

遮眼梅花不要多着人無復奈香何月明羞看銅壺影
矮樹斜枝憶短坡

吳娘解滴酥成藥天女能融蠟作花付與詩人說妍醜

風流二士本同家

天上姮娥白玉肌
藥珠宮女鬱金衣
相逢月下渾無語
笑指蓬壺作伴歸

病中戲作本草詩

長空青雲晝風卷
雨餘涼生開病眼
垣衣洗雨綠生光
芍藥翻堦紅照晚
幽人却掃驚半夏
獨杜衡門心頗遠
提壺勸酒意甚勞
花間伏翼終日號
大棗如瓜安可得
竹葉豈宜空蟹螯
何當如淮注石斛
天南星移碎紅燭

錦纏更命劉寄奴回雪香柔體如玉人生富貴不早休
烏頭成白空自愁浩歌自駕木蘭去范蠡實能知遠遊
君不見赤車使者將君命五加皮幣不少留一朝逐客
便當去王不留行空淚流又不見浪蕩子長負羈縻石
下長卿無住着賈論空高遠志孤屈草初成奇禍作何
如獨活考澗槃不遇自然同此樂嗟余知此解馬銜蝸
盧僻在陵陽角誰能更朝紫真壇丹砂豈解駐衰顏五
色神符亦安用菖蒲謾說能引年玉泉泠泠漱虛壑獨

尋鶴虱負朝暄故人遠引羈旅夕寒水石畔思清言何時從容乃如此烟蓑去作牽牛子平生甘遂丘壑貧常有憂懷思洗耳

道由於潛將遊西菩問之路人則云過之已遠人生如落花隨寓皆可喜但恐兜羅繇牽連入荆杞我馬今未羈猶堪作幽事道逢西菩山欲問參寥子舉鞭信蹇驢褰裳渡流水隱約望三山展轉繞十里吳兒指似儂但隔一山耳塗窮殊可笑興盡亦復止吾曹坐天

阨萬事無不爾小者今復然大者斯已矣

越臺夜雨

夜暗秦淮雨燈昏越女祠寒窓歸夢短秋枕客情知
雁初何定雞蟲事亦卑明朝江上去重理釣魚絲

晚遊戒珠寺寺王逸少舊宅寺僧秉燭觀王右
軍畫像出訪鵝墨二池歸已三更

悠悠倦徂征忽忽厭羈旅出門復風埃况乃迫繁暑茲
遊愜初心突兀見精宇高人昔所廬樹木亦奇古微風

入冠裳林影散廊無僧窓靜無塵燈火照眉宇閱此坦
腹姿鬚髮稀可數樂死固不虛顏色如處女平池渺清
深淅瀝過新雨誰言臨池工至技本天與鵝羣久已空
團扇復何許興盡且當歸夜半月方吐

歸雲洞

南華老明師遺像頗清古昔為掛空月今作歸雲土雲
來初無心雲去定何處空餘暗竇泉翠盎含白乳華堂
誰復枝缺甃久未補林深自成風山潤疑欲雨窮幽眼

未饜曳杖足已苦入山無與迎出山信誰阻有客自去
來山僧無一語

次韵次卿見寄

此生懷抱向誰開唯有華顛苦見催萬事只今渾是夢
寸心堪笑已成灰路長安得詩飛去交淺唯愁雨不來
此意喜君無冷暖尺書頻寄塞鴻回

食瓜二首

郊侯昔微時刀筆一小吏起依日月光勛業高百世道

大原不容功高亦為累所以韓彭徒累累就庖馘蕭何
于是時身任天下寄坐安劉帝心賴有東陵計東陵固
明哲避地有深意此物原不凡世俗豈知味此味當自
知未可語兒輩

元和數才子例指到元白香山詆中奄進寸輒退尺元
侯躡要塗崔子實卯翼兩公賢與愚何啻白與黑二武
有直氣詆評恣呵斥蒼蠅從何來汙我盤中食想像懷
昔人撫几三歎息

遊衡廊山山中有梁武帝杯渡禪師像

瀛渤從來是一漚何妨飛錫到中州
解將瓶鉢橫雲海懶向秦淮障逆流

次韻韋深道見寄

不見蘇州五字詩韋郎有句解人頤
長饒白柄林間事折角烏巾世外姿
失馬未應無後福亡羊政恐坐多岐
人生一笑真難事白髮逢君苦恨遲

宿琴高岩二首

琴高古仙人控鯉飛上天丹鑪訪遺跡邂逅餘山巔石
壁削寒玉萬仞凌雲烟隱雨有石屋垂釣臨平川舊聞
釣處石可坐八九筵邑宰頗呼客醉歌日留連里胥厭
追索挽石沈深淵高秋見涯涘巨石呈方圓斯民不可
擾此理甚坦然豈非仙聖居未易汙葦簾餘生欣晚遇
想像追真仙淨綠不敢唾薄暮聊周旋

長川抱空岩春水三月深有魚歲一來瑣細如寸針網
魚聚乾腊白艇爭分陰與人作苞苴囊紗走權門人言

投鱸殘成魚只侵尋豈有仙家庖烹鮮赤刀砧又言弃
藥滓入水成纖鱗仙事亦渺茫詎可窮本因不知誰作
古遺禍今猶存殺魚歲億萬可易千黃金僅令貴公子
醉嚼聊一欣世俗自乃爾仙人亦何心

宿隱靜作

短策羸驂山路長松陰十里午風涼飛來一水自碧落
屹立五峯聚寶坊青鳥也隨人聽法老禪聊為客燒香
泉聲繞枕渾如雨月色滿岩疑是霜

次韻石端若惠長句

仲容無雙天下士草木自應殊臭味嵇康似鶴在雞羣
子陽如蛙真井底小巫神氣驚大巫一見斂顏羞欲死
眼無皂白敢妍媸口有雌黃誰諭訾借令卷舌終自羞
吾穎曉然寧不泚伯仁大腹號空洞步兵醉語無臧否
君方二子不啻過視我當如發蒙耳浪將五字比長城
要為庖丁作餘地人言政侶韓潮州欲借新聲與侯喜
蒼顏槁項日摧頽回雪流風更雄偉乃知愚知本相懸

何啻人間三十里我詩頗似西臺書時雖可喜終可鄙
人言嫫母不自憐捧心成顰亦成恥少年有意慕黃初
豈料永嘉聞正始詩壇新拜少陵侯頗笑棘門兒子戲
勸君此語勿浪傳俗物還來敗人意

次韻端若再惠長句

功名本是兒時事過是懸知終少味向來欲度驂駒前
無命能居百僚底未容晚輩識風流頃遣前賢隔生死
黨獄十年猶未開讒口囂囂苦相訾且將皮裡著陽秋

敢復眼前分濁泚顏之厚矣終自羞論少卑之人亦否
路逢俗士呼與言公獨未知其趣耳無人為弔楚客魂
誰肯更作將軍地此心此語只自知聞君足音驚且喜
詞傾三峽頗壯觀氣吞雲夢真奇偉時從霧豹得一斑
行看飛黃日千里如君人物尚淹留此事寧非肉食鄙
枘方雖自與鑿乖瓶竭那知是壘恥一生恨未識荊州
萬事政須咨伯始忘形已自到爾汝論事何妨襍朝戲
人生一笑不易得莫遣征航有歸意

次韵伯尹贈竒童二絕句

它人有子但豚犬是家此郎真芝蘭异時筆底問珠玉
已在只今眉宇間

昔聞徐卿有二子今喜衛家稱一兒只有九方真具眼
固應知是渥洼姿

次韵伯尹晚遊松林寺

詹侯學古淡習次無炎冷高情屏嗜好邃宇極深靜清
心樂幽禪世外得佳境靜悟已聞法踴躍更深省應復

嗤衛侯耄期猶自警能事兩禪師句法頗清穎無誰可
悟言舉世我獨醒故來追若人兩耳靜聽龜我生塵埃
中況迫桑榆景安得薜蘿林婆娑共清影君今富春秋
器業窺魏丙茲遊慎無厭流光不俄頃恐未免簪纓問
道勤造請


次韻韋深道獨樂堂十絕

廊廟登元勲四海歌畫一羣公各交章君乃卜少室
人生幾蠟屐千古一草堂得失了自判較然不須量

隼兒坐永日巖花動微風未知堂中人此樂誰與同
達人信死生過眼閱暖冷了知夢境中此味獨差永
最喜章蘇州有句盡平淡只今把君詩去眼不可暫
鬻錢走京師我笑員半千玉階求自試北牖輸高眠
聞君開華堂圖書富千古應笑碧衣郎試吏坐藍縷
愛酒惜杯乾懶衣愁客至世無錦江翁誰識幽人意
草木各有態臭味久已分願言蘭芷藜東風佩微薰
跂首望衡皋遠目聊增明相逢定何夕劇談到參橫

病後二首

山有生前約花留病後開得閒如我少扶步與誰來閑
戶深防客哦詩穩送杯夕陽如有意催月與徘徊
病起身還健憑高喜欲顛亂山推不去一水忽當前遠
碧飛雙鷺平湍落釣船自今如不死餘日盡詩年



太倉稊米集卷三

欽定四庫全書

集部

太倉稊米集卷

四至

詳校官庶吉士

臣李如筠

主事

臣

呂雲棟覆勘

總校官編修

臣

倉聖脈

校對官中書

臣

高中

繕錄監生

臣

范廷驛

欽定四庫全書

太倉稊米集卷四

宋 周紫芝 撰

詩四十四首

次韻詹伯尹舒天用和答二首

豫章有奇氣鏗然兩青萍埋光久未識神焰凌太清二
子廊廟姿肯負丘壑情會當來冠裳未可終岩壑

我生如智井蕪穢久不鑿況此一日別輒作數日惡碧
雲晚自合紅日麗林薄思君在何許行行繞飛閣

白桃

緗桃落盡又春回
雪白桃花最後開
怪我此生新入眼
問君何處舊移栽
枝頭已暖猶餘雪
江上從今不數梅
只有玉人宜玉樹
翠鬟應近小粧臺

次韻劉元素

白頭煩惱不堪醒
滿引休嫌酒趣行
世事可驚嗟豆落
人生安得俟河清
舊交傾蓋由來久
年少論心苦不情
誰與寄聲劉校尉
肯來同此看春耕

次韻黃夢及見寄

長卿未老久倦遊家無斗酒不得州平生拙甚屋背鳩
羊頭可爛身不侯言輒觸諱恐轉喉怒逢醉尉常反眸
廟堂戛擊方鳴球老人行歌聊飯牛我貧木奴欠千頭
夜長晝短懷百憂巖栖谷汲誰與儔草木黃落空悲秋
飢鷹小呼即下韝老頑不受良工鏤長年憔悴擬四愁
浮生無根同舜漚更以外物為贅疣黃侯皎皎清且修
憐我南冠如楚囚落筆衮衮不肯休人物眼前無此流

合持五線裨冕旒姓名下覆黃金甌萬里一株看驂騑
去年操瑟不見收聞君欲買吳江舟明珠白璧惜暗投
千金價重苦未酬感君尺鯉論綢繆逝將好我那肯醜
微吟有句亦復搜敢撼大樹看虬螭元龍氣高百尺樓
此而未遇彼則不人雖曰畸天乃侔會當有駟旌林丘
釣絲未可歸滄洲

和鄭文昌雨中看花之作

鄭侯好客如鄭莊客常滿座酒滿觴春來洛城被花惱

千金一醉姚家黃。慙慙置酒急招喚。更來古寺窺紅粧。
春風微寒春雨細。秉燭看花花已睡。春光駘蕩與妖妍。
夜色侵凌增娥媚。卧枝不起終無言。臉淚欲垂如有意。
樽中有酒客當歌。我醉欲眠人未起。君不見春來雨急
風屢顛。危芳墮地無餘妍。掃花恐被落紅笑。持杯欲倩
何人傳。愁多滿懷樂事少。人自惜花天不憐。烹羊炰羔
且為樂。酒酣耳熱亦不惡。明朝有興却重來。莫遣殘紅
抱青萼。

題王摩詰畫袁邵公卧雪圖

東京數人物矯矯稱袁公經綸有能事早歲初未逢
何許結蓬茅草樹風淅瀝幽夢寄一椽暮雪深幾尺
平田已無路况復知公門人言公苦寒謂死寧當存
鳴騶入空谷暖律破寒沍豈伊逢異人天實起僵仆
漢明號賢主杖擊無名郎寃囚我自理微緒渠當昌
摩詰亦可人六幅寫奇事浩蕩懷遠圖徘徊有佳思
炎天掛空壁一洗毛骨寒意豈在水雪高風薄雲端

浴罷書妙嚴壁

雲散香槽客未回
月團重淪睡餘杯
小牕斜日無人語
只有松聲入夢來

杖藜

杖藜欵幽步
苑囿粲景物
汪灣小池間
草樹極幽鬱
潑刺跳魚鳴
聿役科斗出
高荷為誰芳
清芬苦飄忽
鷺下復飛去
偃蹇不易屈
空餘扁舟閒
菱藻互蒙密
餘生本江湖
幸不困簪紱
豹席與梭轡
願此寄清逸
一水便有

餘馬用跨溟渤

秋晚二絕

涼月初欣薄露天井梧吹葉又淒然
墻根可笑無名草
依倚秋風翹碧鮮

月向寒林欲上時露從秋後已沾衣
微螢不自知時晚
猶抱餘光照水飛

次韻徐南美題彥符峯石

翩翩佳公子逸氣凌青雲
戲寫蒼石姿遂逼仇池真平

生三昧手舉世誰與倫清詩為披拂警語良亦神一朝
入雙眼二妙俱可人

次韻南美再賦簡僕與王次卿賈善長

交游得二子淡如秋空雲長頭喜問事坦腹意自真但
飽北山蔬固應嗤阿倫句法未得妙畫品如入神豈茲
一漫士可並千載人

讀高帝紀

始皇坑儒生秦室遂顛覆取冠溺其中何乃踵前躅亭

長初秦民秦事鑒已熟事有異取舍安用自窘東方從
豐沛豪起逐中原鹿君王自神武將士豈局促當時分
漢茅素行甚污辱屠沽與刀筆雜然非一族叔孫晚見
推韓彭旋烹戮一弛復一張往往如轉軸高皇躬獨斷
此理深照燭英風渺何之遺事空簡牘

讀淮陰傳

淮陰一世豪勲業滿天地晚節不自全遺恨在百世君
臣如父子焉得置猜忌功高良易疑地大苦難制折筭

下燕齊羣豪自風靡豈有須假王而可鎮齊偽禍生固
有胎失在此舉爾沛公窘滎陽齊卒盡精銳頡頏楚漢
間事若反掌易信豈不自王何乃遣漢使帝意自此疑
齊楚終易位噲等何足羞鞅鞅遂失意晚路說陳豨咄
嗟甚兒戲呂姥何能為公乃自失志

二月二十八日雪晴步上西山亭示天用兄弟
二首

山崦猶殘雪人家欲禁烟客寧嫌鳥語晴亦借花妍愁

色連千里春風又一年亭高莫回首白髮滿江天

晴色牽人出春風惱不歸鳥爭呼永日花各醉斜暉杖

策從誰去持杯與願違兵戈愁外滿人物眼中稀

時睦州亂

和人摘茶陸鴻漸茶經云葉如梔子花如白薔

薇皮日休茶塢詩云好是初夏時白花滿烟

雨乃用茶經語也蓋茶至着花則晚矣

結廬聞似輞川家更趁東風摘露芽短夢喚回春正好

枯腸搜盡句方嘉酪奴語陋真堪笑瑞草名高豈復加

明歲莫教烟雨裏白薔薇秀小巖花

次韻姑谿興國寺晚眺

姑谿李之儀字端叔東坡門人

禪房花木有殘紅
此地還因曲徑通
竹影看搖金瑣碎
風鈴解語玉丁東
人來白鳥橫空處
山在先生倚杖中
絕唱未酬才已盡
夜燈搔首鬢如蓬

錢申仲大夫索四亭詩各賦一首

白雲亭

登臨思昔人有意在山麓
舉首瞻孤雲悵懷思宰木雲

亦初何心意乃自感觸人生風木念此念何由足忽忽
不可留悠悠空滿目願言結斯廬聊用慰幽獨

芳美亭

春風始用事天意有反覆坐令冰雪姿吹作錦繡谷粲
粲玄都花依依照人目花氣欲薰人醉眼眩紅綠想當
瓮頭春頗為客頻漉慎勿遣紅雨零亂飛滿屋

遂初亭

為貧作漫仕未必勝陸沈冠纓日羈縻鬢髮空侵尋昔

為雲出岫今作鳥歸林暮年一丘壑往往諧初心
窻明設淨几夜露張鳴琴緬懷靖節翁更賦歸來吟

通惠亭

昔人品淄澠惠山壓東南誰知十里隔通此一
勺甘初不勞籜龍漫山走嵌巖方池汲清碧地脈
通溶涵甌落飛雪石鼎鳴風杉懸知與佳客午夢
回春酣

次卿與余終日坐竹間以何人有酒身無事誰
家多竹門可款為韻余得上七字

養病慕夷曠避俗蒙譏訶用茲結神交長年與婆婆脩
簞不見天萬玉方森羅隱几張淨琴共鼓南風歌人生
要行樂取樂不必多儻無一笑適奈此風月何

典午方中否舉世無賢人高爵豈不佳奇禍終相因七
子各見幾引身良及辰至今白眼徒往往多怒嗔愚智
不同調孤高固難羣自信苟不疑俗說空紛紛

人言不如意十事常八九君看得意人奪去亦難守子
雲草玄文覆瓿人不取更喜淵明門春風五楊柳當年

富貴士泯默亦何有乃知百世下靜者差得久

昔年嗜酒人常恐不到口臥甕寧免賊窺竇真若狗幸
茲身無事家復有名酒竹亦不待尋清陰到憲牖長嘯
風滿襟相勸杯在手不知平生歡重復有茲否

人命甚脆弱百歲良逡巡日月不可恃齒髮寧長新但
恐缺欠間二首仍六身塵冠急須彈荷佩便可紉願言
同耦耕永繼沮溺塵會看此水頭有人行問津

子猷愛竹者起臥與竹俱未知有何好不可一日無我

亦澹少欲鴻毛視金珠眇觀霄壤間無一可與娛眷言
此青士平生有葭莩可憐杜中舍羽林觀萬夫

人生天宇間動作均有寄誰知林下人亦復有幽事短
步舒微芳長吟抽逸思有夢煩青奴無絃須綠綺寒日
忽滿窻香銷人未起慎勿喚客來昏昏敗人意

次韻伯達大水見懷二絕

雨漲平池綠似淮半扉春水眼慵開無錢得買扁舟去
莫道舊來今不來

相望千家信不通
懸知春在雨聲中
蹇驢欲去愁泥滑
安得西飛六尺鴻

次韻趙思誠沈彥述春日回答

三千客裏賢公子
八詠詩中瘦沈郎
他日功名垂竹帛
只今歌笑共杯觴
鳥能娛客時相勸
雨亦憐花不打香
喚取春來同一醉
天教閒日為君長

次韻次卿宴坐燒香二絕

燕堂窻靜一簾垂
鵲尾薰濃客未知
稍憶風流王子晉

月明閒弄玉參差

薄霧霏霏欲滿空
爐烟不動寶薰濃
莫將俗語譏時輩
更學東京范蔚宗

三月二十二日遊昭山前一日謁禪師死

今日天色佳晴光與山秀
道人邀我出共訪山中舊馬
首轉巖阿佛屋露螭獸殘花
趣春事白水決崖溜山行
亂人影香火各奔轍禪師秋
月空遺像孤鶴瘦平生三
昧句高壓島與晝風吹水成
紋妙語本天就莫言鳩摩

羅臨死出神呪

與松林道人求竹栽

人生殊臭味不異猶與薰歲晚期金蘭矯矯惟此君
緬懷古招提脩竹如雲屯道人淡無與所居竹為羣餘陰
滿牕戶肯惜為我分他年蝸牛廬淨几橫清芬踈踈便
可意靄靄亦足欣千畝不足侯萬夫寧是軍客問有何
好仰屋不必言幽徑儻可開遲子日款門

次韻李姑谿過王次卿留終日

昔日風流李泰和暮年流落竟如何追隨天驥元分路
蹭蹬金鑾不上坡人物眼高誰睥睨江山興在且婆娑
幅巾倒載歸時節想得扁舟漾月波

次韻端叔題余所藏山谷茶詩尾

翰林門生兩蒼壁似是天人人不識學得黃初五字詩
不作人間萬錢食晚向江頭看藥欄花前一笑聊開顏
自言千載司玉局尚記橋山分省宿今朝玉乳打團龍
昨夜新詩刻紅燭我識風流李元禮人物流中有涇渭

平生漫刺不浪持，晚得龍門略相似。
詩成袖手初相羊，便識從來錦作腸。
夢回却誦喬雲句，彷彿官焙聞餘香。
從今下客牛馬走，問字不妨時載酒。

次韻端叔疊前韻見貽，因以為別。

夜光分得千金璧，從來有限未省識。
一從韶濩到兩耳，三月遂令忘肉食。
高樓同倚百尺欄，江山滿眼方怡顏。
先生官冷不坐局，古寺分牀雨中宿。
清談疊疊不斷頭，幾度寒窻拔殘燭。
晚歲升堂來問禮，誰遣黃流入清渭。

金華上天朝紫皇往事空勞公舉似明日山中歸牧羊
九回日斷思公腸他年華屋儻遂約笑語尚聞蘭芷香
青絲絡馬不須走一杯且飲姑谿酒

次韻沈彥述官舍書事二絕

幕中從事最能詩恐是當年杜牧之渠為秋娘方覓句
莫將公事惱癡兒

晚得休文一解顏識君曾是畫圖間陽春白雪何由和
句有雌霓誦亦難

擷野蔬示小兒

荒村無雞豚何以供刀机山蔬雜百種此物含妙理幽
居有勝事一笑隨稚子朝飫飯鳧苾暮鼎羹馬齒荀包
出土肥蕨芽含露紫試採少陵苕更擷天隨杞舉杯香
覆坐搖喉滑流匕悠然理塵策果腹萬事已君看金谷
樓步障五十里韭薺及豆粥為具咄嗟耳回觀竒禍作
一死政坐此寄聲肉食徒吾事勿輕鄙

題趙侯畫滄江遠岫圖

公子風流絕代無名高當與大年俱自從剪得吳江水
不愛滕王蛺蝶圖

太倉稊米集卷四

欽定四庫全書

太倉稊米集卷五

宋 周紫芝 撰

詩四十五首

次韻吳思道贈姑谿道人

殘生擬覓山中伴萬事厭從兒輩談
笑我攜家常作客羨君買地已成菴
早將遼海千年夢換得曹谿一滴甘
聞與道人新結社懶雲今不是常參

次韻次卿攜酒見過

睡過花時無好懷柴門誰閉復誰開擬從月夜放舟去
更趁東風攜酒來鬚髮且休論早白悲歡正可付殘杯
君無舊雨仍今雨相見應須日百回

送虞伯瞻以宣城尉為上元方田官

曩時人物詢石渠風流文采知諸虞老成不見典刑在
定識載行家有書此郎胸中有涇渭不比當年潮陵尉
可憐汗血名家駒未有長途試千里空鞭赤兔鞮臂弓
射殺窮山赤丸子只今廊廟方賡歌羣材並用肩相摩

將分壤地辨壚稟要追禹跡窮岷嶓懸知使者欲推轂
豈止朱墨精研磨簡書可畏君莫厭會見天邊給飛傳
時來富貴亦偶然且盡十分金潑灑

收次鄉近書二首

故國春空老三吳信不通客猶如社燕書或寄賓鴻鬢
髮風埃裏林廬夢寐中西歸如有意一笑復誰同

白水彭門道秋風古戰場人應思故國樓更在斜陽消
息憑魚素遊從問草堂蘭芽知已茁何日見諸郎

懷舊一首

并引

三月晦日飯餘方開淵明詩編誦停雲未竟
而彭門故人忽遺遠書喜不能勝因效其作
以寄意焉

三月既晦維暮之春居我窮巷門無雜賓誰與晤語千
載一人歌此好言以侑清樽酌我春醪載笑載欣言念
我友在彼彭門江濱之別于今三年夏夏隻影祇復自
憐素書聿至式慰我心蔚我嘉木有鶯在林尚求其友

載好其音人而不如懷其情何當言歸昔盟是尋春
此二老實為蘭金

晚霽

翠葉看成幄濃春喚不回愁今連落絮雨欲到黃梅掃
地花狼藉開門燕往來晴峯數點出暝色一禽催

過張參軍故居曲肱亭舊基在馬山谷老人名
亭且有詩所謂鄰雞呼不起擁被聽松風者
是也

脫手新詩咳唾成曹劉鮑謝未為能少時不厭家如磬
歲晚聊因酒作丞天與吾人終淡泊才如此老不飛騰
蓋棺何物無遺恨太史知公解曲肱

雨餘便有秋意夜聞絡緯聲甚急

朝來三尺雨一灑遍原隰秋風掃快霽涼氣便相襲幽
人倚寒窗睡眼已生澀淅瀝聞井梧風枝擺餘濕推枕
夜未央牽幌月還入淒然裘褐念感此絡緯泣嗟我豈
不知索衣寒無及家機臥空軸麻縷無可緝殷勤語秋

蟲相煎何太急誰能太早計不死會當給吾言甚酸寒
不足勞掇拾書之示二豪以當一笑集

入秋初種芭蕉

着葉芭蕉三四根怕秋全似可憐人老來安得無餘事
細聽維摩說是身

中秋無月夜半大雨忽憶去年江樓之會

去年秋半西江口夜上江樓飲江酒欲問青天借玉盤
等得浮雲變蒼狗天風慘澹含清秋夜色蒼茫江水流

移床傍簷看月出月未肯出令人愁圓蘆吹裂客罷語
恐在丹霄復何許一聲初自耳邊來三更却向樓前去
人生無定可堪論東西南北似浮雲故人吹散天一角
驚鴻零落秋江羣今年不聽鳴江櫓月黑風悲窓繞樹
一杯無酒可澆愁夜閉蓬門聽風雨

九日至蘇家園

良辰不浪出坐久無誰言閒攜老鈴去旋覓登高樽悠
然理孤策徐行當華軒步穿鼃鼃徑來過雞犬村炊烟

起茅廬行沃多平原翳翳桑柘密靄靄未黍繁黃童與
白叟相攜負朝暄我求方寸地擬設常關門誰知南岡
底近有蘇家園心知淳朴處可避喧囂煩歸來得好語
高意誰當論他年劉子驥定覓桃花源

過雙廟

巡遠功名絕古今後先俱死只侵尋兩家子弟猶相訾
百世何由識此心

行邁一首

秋山淒無風木葉寒自萎
羈客不得歸行邁日靡靡
瘦馬嘶暮塗忍飢渡寒水
落日晚更明棲鳥驚復起
人生各有求誰能異生死
行行重行行辛苦那得爾
亂石摧前輞旋車亦當止
飢寒苦見驅臨風一長喟

暮宿一首

朝行繞山麓暮宿投孤村
父老頗見招落日猶在門
庖烟不滿竈汲水復抱薪
為我炊黃粱一飽裁逡巡
百金得香醪湛湛盈清樽
我雖不解飲亦足濡我脣
濯足捫

飽腹燎衣暖餘薰願言息劬勞少浣塵埃昏慙慙戒鳴
雞未用呼晨暾

汴隄冬日二首

榆柳風微不動塵平沙如粉襯車輪今年汴上三冬暖
已帶長安二月春

當年漫漫雪如塵古汴重冰欲折輪暖日如今著行客
長安三度見青春

將出京

老恨愁千斛
飢須粟一囊
遂成遲去魯
還作薄遊梁
客思風塵惡
鄉音道路長
何時秣歸馬
看我理晨裝

雪後再至菊坡

長安二月春風裏
馬似遊龍車似水
青鞋久慣踏江沙
黃帽豈堪隨馬尾
梁王舊築黃金臺
臺荒草滿誰復來
雲中羽蓋去不反
坡底菊苗寒欲開
老僧相對話鄉井
童子瀾苗分乳杯
為言諸老有遺跡
細尋石刻摩蒼苔
春風無情固相似
倦客逢春還少味
離邊踏雪憶故年

渡口呼船夢千里人生萬事要隨緣到處一身俱偶然
林間春動有佳興更攜官焙來同煎

寒食滁陽阻雨

去年東書薄遊梁今年下馬古滁陽
滁陽寒食少人出滿城山雨驚淋浪
閉門客舍頗無事五白大呼同舍郎
樽前誰唱醉翁曲烏歌花舞催紅粧
竟須薄酒澆永日肯放羈愁煎客腸
功名老矣白髮出歲月幾何歸路長
江頭藉草作寒食細雨梨花思故鄉
何當秣馬候明發

便可一葦橫長江千村萬落鳥呼客山南嶺北花吹香
仍須戒婦速作黍會見鹿門歸老龐

遊醉翁亭

醉翁詩裏識滁山蚤歲神遊只夢間雲外淺寒欺短帽
馬頭深秀得烟鬟時攜妓女人猶說倒著接羅誰與還
文物風流今掃地亂泉空繞玉孱顏

謝公塋

風流謝文靜世俗未可屈但怪東山雲肯為老桓出誰

知姦雄心本自畏豪逸君看新亭會此意未易詰坦之
獨何者手版遂倒執煩公揮蝟須談笑安晉室暮年淝
水師苻秦甚窘急幅巾碁局間百萬一戰襲功名亦餘
事聊為兒輩立平時誚虛曠聞此自羞澀萬古終悠悠
客意頗蕭瑟忍看西州門更作羊曇泣

卞公祠

卞公古剛者直節不可挫巖巖六龍子矯矯中興佐可
憐謝幼輿梭飛齒還墮志懷不事事見面輒欲唾非關

執鄙吝要欲激疲悞茂弘豈駕駘廟社因遷播維公抗
劇賊嬰此不測禍平生忠義氣臨絕不自奈憤心握兩
拳爪甲穿掌過英風渺何之末路悲坎軻高堂風入帷
壞壁塵生坐清魂不可招聊為歌楚些

遊定林

青山繞招提危磴迎屐齒泉聲去悠悠秀色來疊疊定
林得幽處勝踐發新喜當年手種樹來禽雜青李橫斜
照壁詩平淡如止水尚想扶風帳橫經多士子奈此後

學徒發冢用詩禮朝回丹青像暮撒配食簋空餘古祠
荒老木寒籐委遺像猶便念往悲復起舉似與山僧
山僧豈知此日暮歸去來林深足荆杞

采石道中示伯尹

飛盡楊花京洛春又將一舸到江濱聊憑淺碧浮烟水
為洗軟紅隨馬塵紫蟹黃雞秋漸近東阡北陌酒將醇
只今我與君同夢他日君容我卜鄰

伯瞻作酒官植竹局中見索鄙句

虞郎種粟秋不收一生坎軻多窮愁有才無命百寮底
人笑獼猴騎土牛蚤時脫身隱吳市晚歲作吏分糟丘
貴人官高印如斗君獨雞栖馬如狗騎曹只可呼馬曹
漫仕何人知漫叟平生好竹心未闌小分雲嶺青檀藥
橫窗尚恐翠露薄得雨便作秋聲寒向來麴蘖一掃盡
風月已足供蹢躅吾門如市心若水箕坐不知身是官
念我平生絕韻友相從久結無情歡君當下榻我亦往
風雨對眠聽夢殘

次韻次卿寄李姑谿時欲問舍宛陵

我亦平生願執鞭拜公眉宇記當年泰和人物真圖畫
李白風流是列仙雪裏已無回棹意文中新有卜居篇
幅巾還作溪堂夢何日相從句水邊

河魴三絕

水沒春江不見沙河魴吹絮荻生芽平生所欠但一死
可更杯中論鑊邪

釣蓑常恨此盟寒雨歲珍庖屢入盤細雨春江從此逝

不應猶棄季鷹官

一飽欣然下箸餘
庾郎鮭菜復何須
當時獻納堪憐許
只解區區說鱖魚

戲蛙

夢回閒看繞燈蛾
窻外蛙聲雨更多
莫遣盤中種鮭菜
要留水底作笙歌

為蛙答

偶作長吟君莫嗔
一泓聊占小池春
斗升雖未分公廩

青紫猶堪作賣人

語在建康實錄及南史中

次韻李子澤過次卿谿堂二首

溪雨廉纖作晚晴
斜川風物喚淵明
歸來定自有新句
醉著烏巾一幅輕

時人但數李北海
惡客遠過元次山
笑我不能同一醉
也來谿上看烟鬟

次韻次卿穿池得古研

功名到手莫嫌遲
妙琢先分紫玉池
他日北門當視草

只今南澗且題詩人間未忍終埋沒神力應先作護持
好替青氊成舊物知君家有寧馨兒

次韻次卿鳴琴終日二絕

大音固自元無曲綠綺何勞更著絃此調最高人不曾
未知今復為誰傳

平生有味在朱絃想得清風入指寒小閣香消簾不捲
知君不為俗人彈

代人贈別二首

縷金歌裏越姬羞紅蠟光中翠黛愁貪向樽前話離別
不知郎酒十分流

越奴年紀似羅敷年紀無多情有餘別後此情能記否
好憑北鴈寄南書

端午日小雨已而復晴

斷雲飛雨過平川吹作團藥碧玉天酒綠強能開病眼
條長那解繫流年間收艾葉晴窗外忍對榴花白髮邊
細葛香羅天上有烏紗白簟北窗眠

五月七日南堂見楊花

柳深何處可藏鴉
窻繞長廊綠暗紗
造物惜春知有意
薰風時一度楊花

五月八夜月色明甚望麻姑昭亭二山

天高月白夜漫漫
倚杖來看月下山
老眼直窮烟靄外
諸峯渾在有無間
翰林耽酒今何處
仙女乘鸞去不還
天恐兩山看未足
故飛明鏡照孱顏

昭亭蓋舊名敬亭
相看兩不厭只有

敬亭山李白詩也

讀林和靖集書其尾

泉石膏肓挽不回
笑看高少仕塗開
暮年封禪無遺藁
平日江湖只釣臺
月自黃昏人已老
鶴無消息客誰來
吳兒不解高人意
秋菊何當薦一杯

六月四日大水

夜雨聲喧萬壑雷
奔流明日自天來
深疑瓠子河初決
復訝浮山堰始摧
水洄成梁真漫爾
山行乘橈信悠哉
望中何物關詩眼
銀海光中碧玉堆

潘澤之惠合谿蘆服種

庚郎鮭菜只春蔬
新向金城得上酥
會見銀絲堆細縷
酒香橙熟鱸江鱸

太倉稊米集卷五

欽定四庫全書

太倉稊米集卷六

宋 周紫芝 撰

詩四十三首

忻師開小軒秋霜之側范龍閣名以絕塵要予

作詩

虎谿大士軒雖小龍閣老翁詩更新積翠但令常到眼
軟紅元不解隨人抗容俗裏自得計望拜馬頭渠豈嗔
只好與君供一笑世間何事可關身

次韵劉元亢讀白樂天與劉夢得書

香山天下士直道可事君口語作奇禍後來成積薪巨
棟雖已捐白壁原自珍百年付春夢千載期斯人可憐
肉食子議者空反唇文華一照耀今古無措紳才高固
不世盛德終少隣鹿鹿數餘子瑣瑣非公倫豐盈與名
譽詎可鍾一身暮年林壑意觴咏全天真君子與小人
兩者自此分寄言顏巷徒勿語傷哉貧

五月二十四日避暑東寺折簡邀子容不至

涼颼呼不來惡熱苦難避城南有佳人相望隔秋水願
言倚瓊瑤相攜謝簪履花木通禪房茶瓜供幽事君方
從簿書相仍日填委咫尺如參商況乃在千里日暮殊
未來清風為誰起

次韻元亢見貽

人生如浮雲夢境無真樂功名繞床盧聚散合錢醵可
憐燈火讀聖處恨未博我非金閨彥敢靜玉闌析哀年
未免俗萬事隨獵較安得共芳洲相期採蘭若眷言平

生歡寧負歲寒約唾手可書紳君意良不薄

次韻元亢雨中見寄

窮巷結蛙廬僅有一席廣風雨不出門山林負清賞悵
懷念幽人道阻不得往瀰漫隔江漢契濶異霄壤清風
吹句來念我作技癢安得從君遊此意良惘惘

酌明寂泉

脩途繚重岡病足倦遊歷山根得蒙泉石盎貯深碧亭
虛繞朱欄綠淨明水色老禪黃蘗米棄置久復憶振策

望青雲清泉裂崖壁至今一掬甘長飲山中客金鼎候
松風蒼龍破圓壁醉腹澆彭亨真味付泯默何當謀挈
瓶徒倚終日夕清甘不可噉猿鳥與同喫洗我兩月塵
爛煮南山石

題王定父淑問堂

平生心笑伯州犂羅織雖工不當威莫採黃金鑄刑鼎
要令青草入園扉子張必大君須記六蓼先亡事恐非
聞說堂成已無訟臥看庭樹轉斜暉

次韻元素登城暮歸二首

天遣劉郎又白頭
少年文學似求由
朱門華轂聊安命
藜杖芒鞋可散憂
大隱未成聊小隱
濁流誰得寘清流
賦成準擬吾先讀
王粲秋來正倚樓

晚來飛鞚上城頭
欲躡華鑣苦末由
醉裏有鄉須着屐
人間無地可埋憂
功名于我真聊爾
人物似君無此流
想對青天回白鳥
半鉤斜月掛江樓

中秋月下作

去年城南作中秋江雲遮月爛不收幽人獨對秋風立
姮娥似隔重雲羞更長忽聽曉鼓急夢去只有殘燈留
今歲不知身在此門枕長江風自起樽中有酒坐有客
江面如天月如水秋風滿樹涼葉飛新歡欲盡還成悲
身其餘幾事不偶老之將至吾今哀人生閱世自有數
萬事反覆難預知何當舉酒一再拜與月更作明年期

宿蔣山

薄遊踐初心寓宿便晚靜山空秋有聲人寂夜更永華

鯨催曉色有客動深省焚香禮大士杖策上危嶺黃金
明宰堵妙音生佛境眼窮天無盡地轉江萬頃緬懷梁
武帝問法昔造請識師鳥巢中道契言自領會今天龍
宮金碧粲絕頂我來脩法供汲水具乳茗願同桑下留
覽勝畢餘景還從天際歸悠然理烟艇

九日登鳳凰臺

落木驚高秋旅食念行役含羞古祠花青蘂未堪摘雲
山不着脚佳節似可惜一嘯百尺臺往趁凌風翺羣山

如玉玦千古園故國孤城打寒潮往事誰記憶玉樹那
得花金蓮去無跡興亡更六朝濺血幾飛鏑重瞳飛上
天錯認避矰戈何年覽德輝古榜猶可識父老無由詢
殘碑少遺刻空餘弔古涕自對斜陽滴

次韻元中芭蕉軒

道人悟無生開軒有深意是身如芭蕉妙語良默契婆
娑坐芳藂聊復此遊戲秋風鳴環佩曉露濕蒼翠閉牕
得陰多涼簟驚雨細索句清夢餘時能助幽思我亦箇

中人平生會佳致此樂倘見分秋策時一至

符川逢次卿遂約同舟

被褐念遊客落帆逢故人晚歲風露寒一笑樽俎春餘
子豈不佳數面聊成親平生不漫與知君意良真少日
共林壑劇談唾冠巾皎然兩玉壺不受一點塵各以口
腹累老大成參辰改坐造物兒有意相怒嗔荏苒時不
再俛仰迹遂陳秋風吹前谿搖蕩生碧鱗不如載扁舟
相視聊飲醇醉聽篷底語共卧南谿垠

次韻國師對月見懷

老子關門不著書
奄奄真復似曹蜍
月來林下苦相憶
詩落眼前歡有餘
滿挹清光歸酒面
小分秋色到吾廬
胷中拍塞愁千斛
特地煩君一掃除

寄徐李長

念昔桃始華
別君漳水頭
相別幾何時
天事司蓐收
闕月六度圓
相見間何濶
百年飛電中
能得幾回別
別君幾何時
憶君如飢渴
飢渴良有時
思君無時節
野人苦

幽獨相值誰與親流落在蒼莽坎軻一傷神相望參與
商相隔雲與泥草木忝臭味笑談極相思相思一何久
行行重回首回首征雁行中有來書否

送王天民歸雙泉

舊聞雙泉居縹渺在寥廓仙人上叢霄遺甃結飛閣廣
庭三百步一木可四角刀圭分蒼虬鱗鬣自斂錯至今
風雨枝疑有孤栖鶴王郎吹玉簫飛鳧下雙屨時乘三
峯雲來繞月城脚人生多乖離未踐繡水約知心念獨

君時來慰牢落我欲從之遊何當解羈縛

圩氓歎

圩氓築敗圩飽腹無粟菽強扶南畝犁辛苦望一熟挿
秧在中田秋來半黃綠白雨忽翻盆積潦啣圩腹波頭
卷春雷洶湧裂坤軸倉皇未出門白水已半屋攀椽栖
木杪寢飯雜鶩鶩客行艤孤舟繫纜怯水宿叩門乞燈
火父老迎我哭我亦一酸鼻軟語聊撫祝老稚且相取
慎勿輒棄遂行看散陳紅官倉有餘粟救爾無遠謀每

飯慙食肉

八月二十日種竹八本

東岡新種八龍孫北嶺清陰肯見分
留取一林聽夜雨
莫教千畝僭封君

次韻次卿中秋月下書所見

三載彭門夢新年故國秋月當千里
共酒要十分酹翠
幕知誰卷雙鬟不奈羞寒蟬莫相惱
啼作晚窓愁

題大著肚并引

金陵朱世英官長沙或有畫箕踞而坐者號
大着肚舊有贊頌皆鄙語朱為題小詩其上
以易之其尾云但將貯酒三千鍾莫話容卿
數百輩余愛其語有味更作此詩以廣其意

平生頗笑王會稽坦腹驚動郝家兒暮年羞澁為懷祖
計較毫末如兒癡嵌嵌更謂周郎鄙自說空洞終何為
達人大觀無不可無鹽未必非西施了知倚杖清言者
外示夷曠中難窺不如此老身如寄萬事縻稜真得計

掉臂行歌眼看天擁膝長吟腹垂地羞遣家奴捧玉環
肯為門生作經笥白肥如瓠君莫輕終年貯酒真酒甕
結喉道士倘復見敢託石鼎譏彭亨

次韻元傑病中書懷

本來無病是維摩人說烟霞久臥疴獨閉衡門春尚在
却攜藜杖句還多已將名字傳三語懶作悲淒和九歌
止酒淵明今復飲便須俗客到無何

次韻幾聖見貽二首

梅花雪後有殘枝留與幽人照夕暉已借水光浮淨几
更將山翠染春衣回中漫叟移舟去月下淵明種豆歸
知我短坡無客到肯攜長麈為翁揮

坎止流行念已輕常關雖設是吾局事如痛定何堪說
出為飢驅豈有情滿座自傾鸚鵡舞半岩擬作鳳皇聲
醉中深意知誰解付與前身阮步兵

李似表雪中置酒席上次韵

東風吹玉塵十指寒欲墮西齋借微溫妙語驚咳唾詩

成酒行間一掃飛電過坐令止酒陶酒戒為君破但愁
飛絮零似我霜髻鬢他年玉堂人伴直誰對臥恨無屈
宋才共續離騷些

次韵元素對雪十韵

雲凍風仍急天低雪未收山寒飛鳥絕江晚一蓑幽曉
樹梅初放風簾絮自投孤鶩迷遠鶴痴立看飢鷗捩馬
歸鞍速韝鷹獵羽道連城埋睥睨千騎冷貌貅何處回
蘭棹誰人擁釣裘閉門憐我病得句付君搜上瑞書三

白登年在九秋何當明月夜同作廣寒遊

甘菊數本舊植之地沮洳湫隘頗有悴色十一

月二十三日移植墻下明日小雨數刻欣然
便有生意

小草偷微生崛起沮洳間託根倘失所憔悴無好顏嗟
哉一大地寧無尺寸閤造物惜不與無乃亦太慳櫟社
豈不惡盤錯未易禁下可百牛轍上可星斗于此物有
遠韻何人憫清孱我移東籬栽往近九畹蘭天心固有

在生理似可還小雨喜霽霽低枝濕爛斑春苗已足採
落英行可餐為我制頽齡使我昇飛仙物微自有知報
君以長年

蠟梅六言三首

剪蠟枝橫隴月釀花蜜滿蜂房誰遣凌寒枝上中含百
和花香

雲珮風侵玉冷仙裳霧卷羅黃家在藥珠宮裏衣薰鵲
尾爐香

桃花占上林，薄蘭芷擅離騷。經欲吊花中，遺逸聊尋世。

外林垞

此花香韻俱絕而二書俱不載故有花中遺逸之句

再賦三首

孤根雅宜幽處空，明宛似僧房。我作蒲團燕坐時，參鼻觀清香。

淺俗微嫌菊，陋麤粗不受葵。黃花裏誰方高韻，人中可比黃香。

移種定從天上世，間那有此香。白髮人應羞看鵝兒酒。

可爭嘗

送詹伯尹之大梁

寒風轉平林密雪吹重裘遊子當北征朝曦趣行輶人
生會有別一訣寧復愁念君最少孤束髮勤清脩壽母
豈不力白髮今滿頭功名唾手事歲月逝欲流長安小
車兒哆口笑土牛君才豈不高逸氣橫九州弊帚已干
金白壁價未酌願言慎行李去去君勿留

次韵何師與梅花二絕示劉凝遠

月姊宮前玉樹春杏花菖葉不同村多情誰道天無意
先與梅花雨露恩

何人急遣蓬萊使喚得春回江上村誰信廣平心已冷
老於花似太無恩

文殊老人寄和張載共賦堂詩要余同作

世無陳太丘民隱念誰訴兒飢不肯乳啣嚵復誰慕殖
祿膏妻孥居官付羈旅何心書下考絕意躡高步張侯
名家郎作吏得奇趣提攜念疲勞憂勤急朝暮散作千

家春一洗五里霧簪纓被餘輝草木飽朝露官閒理朱
絲雲靜落飛屨當期卓子康揚鑣各分路飛書恐到來
築屋寧久住詩成梯幾間酹酢語交互酒杯方流行喜
甚捷官渡歌詩載懽謠鞭箠息嗔怒翰墨良從容流冗
自奔赴聲今訖父老名亦借童孺觴豆落明珠萬壑疾
東注賓從俱鄒枚含毫各驚顧戰須老將鏖兵思勅敵
遇主人方燕喜飲至非草具人生俟河清俯仰有新故
寄言三不欺令尹勿輕忤民今知己疲着艾豈勝炷鋒

傳固應須軺車少當駐魯山久寂寞冠虎寧有數苦恨
郭林宗未遇黃叔度名嘗仰韓老雅意良默喻何當奉周
旋看君琢幽句愧無脫手彈可逐馬中兔只今釣斜川
臨流與誰賦

讀涪翁黔南詩作

阿香名字本無雙流落真成竄夜郎蚤歲浪言腸是錦
只今空復髮成霜名傳故國猶驚座詩入涪川尚滿囊
天為少陵增秀句故教遷客上瞿塘

次韵元亢和邦師喜其歸自錢塘

道人青眼為君開前度劉郎今又來
白雨飽催湖上句紅粧誰把醉時杯
籬邊採菊山千疊渡口呼船谿九回
便恐橫翔到蓬閣試尋林下小徘徊

送呂霞卿呂當世棄官而出家今為道士

得錢夢穢官夢屍等為臭腐焉用為世人
愛官如愛命君獨棄官如棄泥道人胸中少荆棘
一色但種棗與梨華名自毀不足取

語在真語

高位疾顛無乃危魚須忽復入

君手三命循牆急須走朝持玉磬誦琅函夜著黃冠朝
北斗天上雲車久未來壺中日月空長久吳山楚澤兩
西東與子一笑殊忽忽會當握手五百載摩挲金狄還
相逢

趙丞家野堂

近喜崔斯立新成背郭堂傍屋深置屋喚客小飛觴稍
遣花經眼頻移竹過牆官清公事少夢熟鳥聲長藤倚
樛枝瘦芸翻亂葉香騎曹休問馬聲叟漫為郎丘壑胃

中事乾坤醉處鄉人間一遊戲出處兩俱忘

元夕睡起

元夕不復飲夜寒誰與娛人隨千騎出自對一燈孤有
夢須黃妳無情問紫姑鼇山在天上回望隔中區

次韻元素野步

金隄不復上蹢躅矍鑠何勞強據鞍從我泥中甘蠖屈
看他高處作鵬搏錦江春色能供醉濠上游魚亦可觀
聞有平沙邀晚步定隨明月下林端

[illegible]

太倉稊米集卷六